

Á Mesa do Parlamento

Concepción Burgo López, Emilio Vázquez Blanco e Ricardo Vicente Docasar Docasar, deputada e deputados pertencentes ao **Grupo Parlamentario dos Socialistas de Galicia**, ao abeiro do disposto no artigo 152 do Regulamento da Cámara, presentan ante esa Mesa a seguinte **pregunta** para a súa resposta **oral en Pleno**.

Partido dos
Socialistas
de Galicia

O monumento de Santa Eulalia de Bóveda está recoñecido como un dos elementos máis senlleiros do patrimonio cultural galego. De orixe tardorromano, a súa configuración arquitectónica e sobre todo as pinturas murais conservadas, lle outorgan un valor artístico fundamental o que se une o enigma que aínda agora supón a súa orixe e funcionalidade que deu lugar a múltiples interpretacións.

A última foi defendida fai pouco tempo nunha documentada tese doutoral, cuxo autor entende que Santa Eulalia é un monumento funerario dun seguidor de Dioniso aínda que afirma que habería de facer máis investigacións do seu contorno para saber se foi un monumento funerario independente, si formaba parte dunha vila ou dunha necrópole, porque en realidade as investigacións nunca tiveron en conta o conxunto, case non se realizaron escavacións e faltan achegas científicas e a súa contextualización co entorno.

A súa propia configuración e localización fai que Santa Eulalia sexa moi delicado e necesite continuos traballos de vixilancia e mantemento para evitar o seu deterioro, traballos que a tenor do que están a dicir os especialistas, a Xunta de Galicia, responsable de Santa Eulalia, non está a facer.

Dende o seu descubrimento en 1926 foron varias as intervencións que se realizaron en Santa Eulalia, algunhas delas moi pouco atinadas todo hai que dicilo, e as últimas foron levadas a cabo a comezos dos anos 90, así como os últimos traballos de conservación, neste caso da cuberta, se realizaron en 2006-2007.

Dende a chegada de Feijoo ao Goberno, a Dirección Xeral de Patrimonio deixou de facer todo tipo de accións de conservación e mantemento a pesares do estado do monumento que empeora co transcurso do tempo.

Grupo Parlamentario

Fai anos que investigadores expertos en Santa Eulalia están a denunciar os graves problemas que sofre, incluso enviando informes á Dirección Xeral de Patrimonio dando conta de seu claro deterioro sen que a Xunta de Galicia, responsable deste ben único, faga absolutamente nada.

Partido dos
Socialistas
de Galicia

Así, en 2011 alertouse por parte de expertos do estado de deficiente conservación de Santa Eulalia. Por unha parte por utilizar métodos de secado ambiental que estaban deteriorando as maravillosas e únicas pinturas, por outra polo agravamento das continuas filtracións de auga que o están deteriorando visiblemente.

Tres anos despois das denuncias e do informe citado a situación de Santa Eulalia non variou, en todo caso empeorou como é visible incluso para un ollo non experto.

Neste momento pode apreciarse que un sillar encima do fénix da entrada está fracturado e desfacéndose, o monumento está invadido pola vexetación e están sen arranxar os problemas das filtracións de auga, das humidades e dos cambios de temperatura que están rompendo as pinturas. Todo isto ante a total pasividade da Xunta de Galicia que ten abandonada esta xoia do noso patrimonio.

Neste magnífico e único monumento non se fixo nada dende que chegou o sr. Feijoo a Xunta de Galicia tal como poñen de manifesto as respostas a preguntas destes deputados, onde a Dirección Xeral de Patrimonio confesa que o único que está a facer é tomar datos e mostras sen realizar ningunha acción de conservación, nin sequera de mantemento.

Santa Eulalia non pode continuar neste estado de abandono e desidia que está poñendo en perigo a mesma supervivencia do monumento e a Xunta de Galicia ten que tomar medidas inmediatas que freen o seu deterioro, ao tempo que è necesario realizar novas investigacións que amplien o noso coñecemento sobre este enclave arqueolóxico, artístico e histórico de tanta singularidade.



Grupo Parlamentario

Por todo o exposto, a deputada e os deputados que asinan formulan a seguinte pregunta para o seu debate en Pleno:

Que accións vai poñer en marcha a Consellería de Cultura para solucionar os graves problemas de conservación que ten Santa Eulalia de Bóveda?

Partido dos
Socialistas
de Galicia

Pazo do Parlamento, 11 de febreiro de 2016

Asdo.: Concepción Burgo López
Emilio Vázquez Blanco
Ricardo Vicente Docasar Docasar
Deputada e deputados do G.P. dos Socialistas de Galicia

Asinado dixitalmente por:

María Concepción Burgo López na data 12/02/2016 09:58:39

Emilio Vázquez Blanco na data 12/02/2016 09:59:14

Ricardo Vicente Docasar Docasar na data 12/02/2016 09:59:19